

1 PETRO

Kukue Tutε Ko Petro Lεwɔni

¹ Kukue komfo etsyi mɔ, Petro, wɛ ni Yesu Kristo eto ɔtɔnkpe ɔflo. Nlε ko bɔwɔni kɛtɛ mimba ni Onanto eto betidilɛkɛlɛkɛ ba dɛsɛnsɛ bisu benkpe fe bafɔ lɛ Ponto, Galatia, Kapadokia, Asia ku Bitinia eto nsɔ ɛsuɛ. ² Anto Onanto kosate dɛlɛkɛ mi ɛye lɛ wɛ lɛlabi ɛsuɛ. Nya itɛ Lɛwɔnɔ Kenkɛ lɛkpasɛ mi ɛsuɛ biyifo betidi kenkɛ bɛ lɛ bitsyue Yesu Kristo koto, lɛ befi wɛ kɔtɔ bɛflɛ mi lɛ bele.

Lɛ Onanto eto lefonɛ ku diyuɛ lɛ difui disiaɔko mi lefe saa.

Bafokanɔfɔ Eto Lesa Nɛ Banlɛ Kusu Bobe Kɛtɛ.

³ Bitɛ lɛ bɔsɔ Onanto wɛ ni Bonamute Yesu Kristo eto Anto ani. Lɛ wɛ kaminsɛnyɛnyɛ kplɛ ɛsuɛɛ, ɛtɛ bo nkpɛ fɔfɔ ɛye lɛ nnya ɔtakase Yesu Kristo utsyiko ɔkɔmɛ ɔboko nkpɛ eso. Nyamfo ɛtɛ bo kusubebe fɔfɔ ko lɛflo.

⁴ Lɛ nyasoo, bɛlɛ kusu bobɛ kɛtɛ kedikɔ eto atsyɔkpokpɔ fokoya ko Onanto lɛlɔ utsyɛ lɛ kato itɛ wɛ betidi ke lembobia, ka lemboto kɔti, ka lɛmbɔflɛ tsya. ⁵ Kedikɔ kamfo luudi mi kale, mimba ɛye lɛ bofo kanɔ ɛsuɛ bɔlɔ mi bɛtsyɛ lɛ Onanto eto ɛsuɛale ɛsuɛ itɛ bɔfokɛtɛ lɛ nkpɛ bo buulɛkɛ bate lɛ lefe fɛfɛ ɛsuɛ.

⁶ Binyɛ disuɛyue lɛ nyamfo ɛsuɛ, itɛ bɛ biunyɛ kanyi lɛ lefe kliminti ɛsuɛ ɛye lɛ botokabɛ kpɛ ɛsuɛ tsya. ⁷ Nnya ni bɛ lɛ befi bato mi

babe bæ befo bæno sitinti. Fe kase baato sika sia laafo bobia kabe læ utee, nko ke bæbæ mi bofokano bo lefo koya bonso sika kulaa tsya boto kabe læ ute əsuə, læ befi babe bæ buutsyæ itə lefe saa. Nyamfo ebutə Onanto atesə mi obesə mi kato ufi dibu utə mi læ diyi nə Yesu Kristo læbo ubə bənyə wə. ⁸ Ite bæ biənyə wə tɔ binyə tsyaa, biala wə. Se bennlə wə bunyə mɔmɔ tsyaa, bəfo wə bæno nya mi disuəyuənyənyə nso buləkə katəyi. ⁹ Kase bəfo wə bæno esoo, itə bæ Onato ətə nkə mi kakla nyə nkpə.

¹⁰ Onanto eto bənyələkətidi ba lébe letsya itsyi læ kase Onanto læbæ mi ətəsa butəə, áto bánɔ nya báfefe keklege læ kase Onanto læbæ mi bofo læ nkpə. ¹¹ Báfefe bæ læ bate itsyi læ lefe nə yubə ku kase yəbæ bubə. Lefe nəmfo ni lefe nə Kristo eto Ləwɔnɔ nə nkpe læ mə əsuə nlə kɔni bote, kələkə kate kanyi ka Kristo ele bæ unyə ku diyənde nə luutəkə nnya kama. ¹² Onanto ələkə óte bənyələkətidi bamfo nkə inni itə mə əsuə eto kutəkə eso banlə keyifo, bomu itə mi. Bédi etiki betsyiko asa nnya mba nlə Ditiki Σε nəmə letsya bobə kətə mi mɔmɔ εε læ Ləwɔnɔ Kεnkε nə Onanto létsyese itsyi kato eto əsuəale əsuə. Onanto eto batɔnkpe kulaa tsya ála kokoko bæ eni læ bate lesaatsyue itsyi læ asa nyamfo əsuə fε.

Ele Bə Bafokanɔfɔ Siə Nkpe Kεnkε.

¹³ Nyaso bimue əsuə bitsyæ itə keyifo. Bimue əsuə bitsyæ kukɔnɔ læ bikabe kusu keklege itə Onanto eto atsyɔkpokpo nnya wuutə mi læ lefe nə Yesu Kristo læbo bənyə. ¹⁴ Bitsyue

Onanto eto ditiki koto nya biëntə lə asa nnya dıkənə mi kakpe lə abua əsuə kə, lə lefe nə Onanto eto ditiki dímankpako mi tɔɔ, lə isi eso mi ani mɔmɔ. ¹⁵ Bomuu, fe kase Onanto wə lékpadi mi nte kenkɛɛ, mi tsya tsyə kenkɛ lə lesa saa nə biuyifo əsuə. ¹⁶ Itsyise báwɔni bakpe lə Awɔnisa Kenkɛ əsuə bə Onanto átɛyi nkə, “Biyifo kenkɛ, itsyise nyifo kenkɛ.”

¹⁷ Biakpadi wə biə Boanto lə beɛ ola boto kətə Onanto wə laambe utidi eto ənəmi lə ɔɛ lekpo bokpo ku utidi lə lesa nə utsyuə saa díyifo əsuə. Lə nyasoo, fe bafɔ lə kaso mfoo, bisie mi nkpə fɛfɛ bifi dibu bitə Onanto.

¹⁸ Itsyise biyi kayo ka Onanto léfo lə mi disi fɛ úləkə mi utsyiko lə nkpəsiesiə ləmbə kutəkə bo béfo bitsyiko lə mi banamə ofɔ. Inni lesa nə boofɔ bobiasə fe sika sia lee sika flubia seka.

¹⁹ Bomu iyifo Kristo eto kɔtɔ ko lefo koya, wə díyifo fe Lesamubi nə leɓua saa ləmbə lə əsuə, lékpa lɛfɔ kenkɛ Onanto dífi útə kedi lə mi disi.

²⁰ Onanto ələkə wə utsyə fɛ béyifo kawunsie nya úləkə wə óte lə eyifɛfɛ nyamfo əsuə lə mi disi eso. ²¹ Nya eyɛ lə Kristo əmfo əsuə esoo, béfo Onanto bɛnɔ. Nya wə ni futsyə létakasə wə utsyiko ɔkɔmə úbə nkpə nya útə wə kedikɔ ka nkpe dibu kanso kenkɛ. Lə nyamfo eso béfo Onanto bɛnɔ, nya bífi mi kusubebe bitəkə lə wə əsuə.

²² Nya se bitsyue ɔnukualɛ əmə koto, eyɛ lə nnya əsuə békpasə mi əsuə biə biola mi bafokanɔfɔ tsyue lə ɔnukualɛ əmə esoo, ele bə bela mi bətsyue itsyi taa mi utu kəmiə ke.

²³ Onanto ətə mi nkpə fɔfɔ eto businkli kale.

Inni utidi wə leekpe dísinkli óle mi, bomu nwə leenkpe kulefe léle mi εye læ Onanto eto ditiki nə nsi nkpə lefe saa əsuə. ²⁴ Itsyise Anantotiki áteyi nkə,

“Betidi kenke te fe sefa seka.

Nya mə kələkə kenke te fe sefa eto efukpokpo seka.

Nya se efukpokpo laaylobe kalo kewui.

²⁵ Fεε Onanto eto ditiki te lefe saa.”

Ditiki nəmfo ni Ditiki Sεε nə bábe letsya bətə mi nε.

2

Bafokanəfo Ni Onanto Eto Betidi Kenke.

¹ Nyaso bisinkli bεye asa bua saa eto okle buyifo. Biləkə mi əsuə bitsyiko læ sedi-atēyiteyi, ənəmi ənəmi eto nkpəsiasie, kut-syuəsekprənkprə, ku utidi eto diyebiasəbiasə əsuə. ² Bela Onanto eto ditiki tinti nəmə fe kase bebisambi laala mmintu keklege bæ læ bebe bekpe læ mi bofo kanə əsuə fe kase Onanto laala. ³ Itsyise Anantotiki áteyi nkə,

“Mi kosate ebunyə kase Bonamute nkpe kafo ekpε.”

⁴ Bibə Bonamute oflə. Wə ni nkpə eto leba nə batonto leni bæ dimbə kulesa nti, fεε Onanto ələkə ni utsyə nkə lefo koya tinti læ wə ənəmi.

⁵ Mi tsya eyifo fe aba nnya nkpe nkpe, nyaso bifi mi əsuə bitə Onanto læ oto ləwəncə eto diyo. Diyo nəmfo kafo biəkε fe besumunyə kənke, nya biəye læ Yesu Kristo əsuə bitə Onanto Ləwəncə eto kedi ka ləkε wə əkəε. ⁶ Itsyise Awənisə Kenke eto Kukue áteyi nkə,

“Nlèkè leba nè lefo koya,
 nya mimfi ni míntèkè lè Sion eto diyo eto
 kaka nso bofe.

Nya utsyuè saa wè lofo wè ɔnɔɔ,
 wembudi kofani kulefe.”

⁷ Nya leba nèmfo áfo koya tinti lè mimba lefo
 wè bènɔ ɔfɔ, nya lè mba dímamfo wè banɔ
 ɔfɔɔ, ele bə bate bənkə, diyifo

“Leba nè batonto leni bə dimbè kənɔ,
 fɛɛ ni bomu díbè léfiani leba nè léfo koya
 lenso kenke nɛ.”

⁸ Nya Awɔnisa Kɛnkɛ eto Kukue eto lekpa
 ditsyuè tsya áteyi nkə,

“Diyifo leba nè luutə betidi tusə,
 lə ni bedu banɔ.”

Bétusə lə ni itsyise bámfo Ditiki Sɛɛ nəmə
 bánɔ. Nko ini Onanto eto Ditiki Sɛɛ nè óteyi
 útsyə nkə yuubə itə mə nɛ.

⁹ Fɛɛ mii, biyifo betidi ba Onanto dílèkə utsyə
 fe besumunyə ba laatɛɛ wə wə ni oka, ku
 kusə kenke ko bákpo atsyɔ, Onanto eto betidi
 ba bələkə bətsyə bə babe Onanto eto eyifosa
 kplɛ nyamə letsya. Nya ókpadi mi utsyiko lə
 ketuntu kamə kəmiə óboko wə diyənde kplɛ
 nəmə əsuə. ¹⁰ Lefe ditsyuə nè léfee, bíenyifo
 Onanto eto betidi fɛ mɔmɔɔ, biyifo wə betidi.
 Fɛ lefe nè léfe məə, báante Onanto eto kamin-
 sənyənyə fɛ mɔɔ, biofo wə kamin-sənyənyə.

Bisiə Nkpe Bo Lɔɔtesə Onanto.

¹¹ Mɔ balala, nɛ mi kələ bələ fe mba ni
 bafɔ ku mba nyɛ kusu lə kawunsie kamfo
 minkə, bilèkə əsuə bitsyiko lə etidisuə eto
 alasa bua nnya nɛ lema bəkponko mi lefe saa

əsue. ¹² Bisie nkpə sɛɛ lə bamamonyə ba nti benkpɛ bə lə bédi etiki bua lə mi əsue bə biyifo babuayifo tsyaa, kamaa, lə bəbə bənyə bətsyə lekpo kasɛɛ ka bíyifo bítsyə itə lə batəsə Onanto lə wə Lekpoyi Fɛfɛ nəmə.

¹³ Lə Bonamute əmə esoo, bebokosə əsue kaso bitə betidi eto aba saa ke bətsyə lə kofi əsue ku Romafɔ eto Okankplɛ wə ni uninə kenke, ¹⁴ ku aba eto bənyɛsiə ba útə əsuəale nkə bənə babuayifo koto nya lə batəsə betidi ba leeyifo kasɛɛ tsya. ¹⁵ Itsyise Onanto aala nkə biti mba ini ebukitiki ete beedi eto nyɛ lə asa sɛɛ nya bieyifo eso. ¹⁶ Bisie nkpə fe betidi ba nsi lə mi əsue əsue. Fɛɛ biemfi mi əsue əsue busie bomfo biyifo asa bua. Bomu bisie nkpə fe Onanto eto ndomufɔ seka. ¹⁷ Bitə utidi saa dibu. Bela mi bafokanɔfɔ tsyuə. Bete Onanto sikpi. Nya lə bitə Okankplɛ tsya dibu.

Bebokosə Əsue Kaso Bitə Mi Banamute.

¹⁸ Mimba ni beyifoyifoo, bebokosə mi əsue kaso bitə mi banamute lə bibu mə tsya. Nya inni banamute ba nkpe kafo ɛkpɛ nya baala mi ete, bomu mba leeyifo mi disiale tsya. ¹⁹ Lə utsyuə lə kanyi bunyə lə kusu ko dimantsyɛ əsue fɛ ini lə Onanto eto disi eso uñyə kek-lekee, Onanto ebokpo wə atsyɔ. ²⁰ Lə bíyifo kabua nya lə nnya eso bənə mi kotoo, nte atəsə nnya biunyə lə nnya əsue? Fɛɛ lə bíyifo kasɛɛ nya bínyə kanyi lə ke buyifo esuəə, Onanto ebokpo mi atsyɔ lə nnya disi. ²¹ Nya nyamfo ni nnya Onanto lela nkə bikeyifo nɛ. Itsyise Kristo kosate ənyə kanyi lə mi disi nya óte mi nkə beyɛ lə wə kayɛkɔ.

22 “Wényifo lebua saa,
 nya wánteyi sedia saa tsya.”

23 Se báka wəə, wánka kuutsyuə saa lə nnya kénye. Se báte wə ohiã wénkudi wə balo saa. Bomu úfi lesa saa útə Onanto wə laakpo lekpo lə kusu əsuə.

24 Kristo kosate léfo bo abua útsyi, úsu úkpe lə uyikabie əsuə. Úyifo nyamfo nko bə lə bəbə butsyi lə bo abua əsuə lə busiə nkpe butə kasəyifoyifo. Úfi afabe nnya ófo ótsya mi bufi.

25 Lə ɔnukuale əsuə, kɔɔ bíyifo fe basamu ba lénya kusu. Fɛɛ mɔmɔɔ, Onanto ákpa mi óboko bə bitəkəko nwə laayenko mi ku nwə laase mi oflo.

3

Ele Bə Bese Ku Bəsiə Fi Dibu Bətə Bətsyuə Lə Kristo Eso.

1 Nya mi besio tsyaa, nko ele bə bebokosə mi əsuə kasɔ bitə mi bese. Nyamfo luutə bə lə mə utsyuə mámfo ónɔ tsyaa, wuufi wə əsuə utə Onanto ɛye lə fə ditsyəbi sɛɛ nəmə eso. Nya inni bə ele bə bətɛyi mə kulesa kulaa tsya.

2 Bomu mə kosate ebunyə kase mi ditsyəbi lekpa nya bəbokosə əsuə kasɔ. 3 Biənləkə mi bənbəbobe bete lə asa nnya biakpe nye kase biakle esi nye atsyabi nnya biakpe kefi kaləkəsə əsuə. 4 Bomuu, beləkəsə lewɔnɔ nə nkpe lə mi əsuə ku aləkəsəsa nnya luutə bə ditsyə kpoo nya diyuə buɛɛ tsya. Kələkə komfo ambia kulefe nya kofɔ koya tinti lə Onanto eto ənəmi. 5 Nkomə seka besio kənke ba dísiə kɔ, ba dífi mə əsuə bətəkə lə Onanto

əsuəə, lébokosə mə əsuə kasə bətə mə bese nnya iyifo kələkə itə mə nɛ. ⁶ Nko ke Sara tsya ditsyue Abraham koto nya ókpo wə nkə, “Mə onamute.” Mi tsya afiani Sara əmfo eto bebisiobi lə biyifo asa sɛɛ, nya sikpi laanle mi lə kulesa saa əsuə.

⁷ Nko ke ini itə mi bese tsya nɛ, bitə lə asakasonɔnɔ lə eke lə mi ku mi bəsiə nti, binyə mə fe mba ləmbə əsuəale fe mi. Bitə mə dibu itsyise mi ku mə ta Onanto léfo utə nkə bibə bisie nkpə lə binyə nkpə manlo. Lə biyifo nkoo, kulesa embuti mi olatoto kusu lə Onanto ɔflo.

Biemfi Lebua Befo Lebua Kayo.

⁸ Lə kalosəkɔɔ, bitə lə mible eto nsusu lə buyifo bəni, utidi eto asa lə ele mi kaminse, bela bətsyuə fe bayimi, biyifo kafəkpɛ nya lə bebokosə əsuə kasə bitə bətsyuə. ⁹ Biemfi lebua befo lebua kayo, nye bukidi lə bukidi eto kɛnyɛ. Bomu bɛle Onanto lekpa lə utə mə atsyəkpokpo, itsyise nyamfo Onanto ditsyə kɛnyɛ nkə bibə bɛke se ókpadi mi nɛ.

¹⁰ Fe kase Awɔnisa Kɛnkɛ eto Kukue letɛyii, “Utsyuə saa ke lela nkə wəsiə nkpə lə unyə mu kamini, nya lə usiə nkpə kentsyɛɛ, wəəntə lə ditiki bua saa lə ləbɔ itsyi lə wə kɛnyɛ nya yanle bə ɔtɛyi sidiya tsya.

¹¹ Ele bə ɔyɛ lebua buyifo lə uyifo kasɛɛ, nya lə ɔbɛbɛ diyuə ku wə utu kɛnkɛ.

¹² Itsyise Bonamute ətəkə ənə lə mba leeyifo kasɛɛ əsuə, nya woanɔ mə olatoto.

Fɛɛ mba ni babuayifoo, waataka kənyə lə mə əsuə.”

¹³ Lə biakplatsya keyifo kasɛɛ, owɔe lookpe mi bulə? ¹⁴ Fɛɛ lə efe bə nyə kanyi lə kasɛɛ ka feyifo eto disi esoo, nyə disuəyuə lə nnya əsuə. Biante mə sikpi, nya biəntə kulesa lə ilə mi. ¹⁵ Bomu bifi dibu bitə Kristo lə mi akəesi lə bitə wə dibu fe mi Onamute. Nya biofo mi əsuə kənyə buləkə kate utsyuə saa wə lela nkə woanɔ itsyiko lə kusubebe ko əsuə benkpe. Nya lə biyifo nko ku disuətsyə ku əsuə kasɔ bokosəbokosə. ¹⁶ Biyifo nnya ku utu wuee, bə lə utsyuə aka mi lə nkpə sɛɛ bo binsi lə Kristo esoo, lə kofani lə kɔlɛ mə lə nnya bətɛyi əsuə. ¹⁷ Itsyise ɛlɛkɛ eso bə nyə kanyi lə kasɛɛ ka feeyifo eso lə nyamfo eyifo Onanto eto lelabi, enso bə lə kabua eso. ¹⁸ Itsyise Kristo wə ni ɔsɛɛ, ɛkpe lə betidi ba ni babuayifo eto disi dikpe lənwe itə lefe nə kenke, bə lə ofó bo bokpa kesuko Onanto ɔflo. Báló wə lə əsuə eto sinə əsuə, fɛɛ Onanto lə Lɛwɔnɔ əsuə átakasə wə úbə nkpə. ¹⁹ Nya lə Lɛwɔnɔ əsuəə, úsu óbé Onanto eto ditiki nəmə letsya útə bekpenkpe ba bėti bákpe lə edi kafo mfó. ²⁰ Mbamfó ni betidi ba dímentsyue Onanto eto kɔlɛ koto lə lefe nə ɔkɛ dibusə utə mə lə lefe nə Noa díkawe wə ɔklo kplɛ əmə nɛ. Betidi esiani ba ni mflamfla ba dídufə lə ɔklo əmə kafoo, mə báfo lə nkpə se ntu bomə díyi nɛ. ²¹ Nyamfo eyifo ditsyəbi nə nle bo bote kase ntuflesəfləsə eto lekpa lekateko ntuyiyi bomfóo, mɔmɔ laafo bo lə nkpə. Yenyifo əsuə eto sinə eto keni bufle kewui bomuu, iyifo kənyeklekle ku Onanto,

kenyeklekle ka lekpa nya ketsyi taa bo akɔəsi kəmiə ke. Onanto aafɔ bo lə nkpə eyɛ lə Yesu Kristo eto botaka ketsyi ɔkɔmə kəbə nkpə əsuə eso. ²² Kristo əmfo ni nwə dísu kato nya unsi lə Onanto eto sediani, wə nlɛ seka budi lə Onanto eto batɔnkpe kenke ku kato eto bəsuəalenyə ku əsuəale nnya nkpə kenke əsuə.

4

Bisiə Nkpe Fe Bafokanɔfɔ Seka.

¹ Nyaso se Kristo dínyə kanyi lə sinə əsuə esoo, mi tsya fi wə nsusu bomfo ke eto okle bekpé mi əsuə nkəale, itsyise utsyuə saa ke ləənyə kanyi lə əsuə eto sinə əsuəə, ensifi əsuə kəkpé lebuayifoyifo əsuə. ² Lə nyaso idu mɔmɔ entɔɔ, bisie mi nkpə fɛfɛ lə Onanto eto lelabi əsuə, inni lə nnya laale utidi ɔkuɛ əsuə. ³ Kɔɔ bisiə nkpə bíyifo asa fe bamamonyə ekle tinti. Nkpe bo bisiə lə lefe nəmfó áyɛ lə setsyeto eto nkpəsiəsiə, əsuə eto sinə eto nkpəsiəsiə, sitekpe, sidikpũũ, budi ku bunə eto ake eti susu ku sifiəsumu eto eyifosa əsuə. ⁴ Nya se biensianko ani ku mə keyifo mə eyifosa kpə nnya ləmbə kasɔnɔnɔ esoo, yeeyifo mə yanii nya baaka mi. ⁵ Fɛɛ yuubə ibə bə buuləkə mə əsuə kənyɛ lə Onanto wə lookponko mba nsi nkpə ku bekenkpe akpo. ⁶ Nyamfo eso Kristo ábɛ Ditiki Sɛɛ nəmə letsya bətə bekenkpe tsya, ite bə Onanto ákponko mə lekpo fe kase baakponko utidinini saa lekpo tsyaa, bə lə ləwɔnɔ əsuəə, lə bəsiə nkpə fe kase Onanto nsi seka.

Ele Bə Bafokanɔfɔ Kenke Kawunsəko Bətsyuə.

⁷ Asa nnya kenke eto kalosəko boyo elo. Nyaso biɲyə bikabe kusu lə bələ əsuə kukɔnɔ, bə lə befo ola boto. ⁸ Fɛɛ nnya nso bofe enso kenke ni bə bikala bətsyuə kafo faa. Itsyise lelabi ətəkə ɔyimitsyuə eto kabua kpə ka uyifo kato. ⁹ Befo mi bayimitsyuə kafo faa, bɔwɔnɔnɔ saa manke. ¹⁰ Mi nti eto utsyuə saa áfo ətəsa ate ate itsyi lə Onanto ɔflo. Nya fe unyəsia sɛɛ saa wə laale ətəsa ate ate nyamfo ola kətə Onantoo, biyifo ətəsa nyamfo eto keyifo, bə lə ibə kutəkə itə mi bətsyuə. ¹¹ Lə utsyuə lə Anantotiki budii, udi nnya fe kase Onanto dítə wə nkə udi nnya utə betidi. Nya lə utsyuə lə kesumu eto keyifoo, uyifo ke ku əsuəale nnya Onanto dífi útə wə nkə uyifo ke əsuə, itə lə befi atəsə bətə Onanto lefe saa eyɛ lə Yesu Kristo, wə eto ale ni diyənde ku əsuəalə idu manlo isu manlo. Ibə itə.

Binyə Kanyi Fe Kristo Seka.

¹² Mɔ bayimi lala, kase banle mi boto kabe benle kanyi bunyə keklekee, yenyifo mi naa bənkə lesa nə bennle kusi bobə kətəə, məəmbə tɔ lə kutsyuə saa əsuə inyə. ¹³ Bomu lə nyamfo esoo, binyə disuənyuə bə mi tsya lə kanyi bunyə fe Kristo ke seka, bə lə ɔbɔ lə wə diyənde əsuəə, mi tsya ebofo disuənyuə bunyə kato keyuluu. ¹⁴ Binyə disuənyuə lə betidi áka mi se bintəkəko Kristo eso. Itsyise diyənde eto Ləwɔnɔ nə ni Onanto eto Ləwɔnɔ siko mi. ¹⁵ Lə mi utsyuə əənyə kanyii, yenyifo bə uyifo uwudifo, uyu, obuayifo, nye nwə laakpe

ditiki nɛ dimanle wɛ kɛnyɛ eso. ¹⁶ Fɛɛ lɛ biɛnyɛ kanyi lɛ mi bafokanɔfɔ esoo, biɛntɛ lɛ ɛlɛ mi kofani. Bomu bɛsɔ Onanto ani bɛ Kristo eto diye teke fɛ lɛ ɛsuɛ. ¹⁷ Lefe nɛmɛ eboyo elo bɛ betsyiko lekprokpronkpro nɛmɛ kasɔ, nya Onanto eto betidi ɛsuɛ yuutsyɛ kasɔ itsyiko. Lɛ betsyiko kasɔ itsyi lɛ bo ɛsuɛ, ntsyɛ yuutsyɛ itɛ mba dɪmamfɔ Onanto eto Ditiki Sɛɛ nɛmɛ banɔ? ¹⁸ Bawɔni bakpe lɛ Awɔnisa Kɛnkɛ eto Kukue bɛnkɛ,
 “Lɛ ite mɛɛ, bɛ yɔɔkɛ ale fɛ betidi sɛɛ lɛ bɛnyɛ bofoo,
 ntsyɛ yuutsyɛ itɛ babuayifo ba dɪmamfɔ banɔ?”

¹⁹ Lɛ nyasoo, mba lɛɛnyɛ kanyi ka diyifo Onanto eto lelabii, lɛ mɛ asa sɛɛ buyifo ɛsuɛ, lɛ befi mɛ ɛsuɛ bakpe lɛ nwɛ dɪyifo mɛ lɛ kɔni kɛnkɛ, nwɛ leeyifo lefe saa lɛ wɛ kɛnyɛtsyɛtsyɛ ɛsuɛ.

5

Bikalɛ Onanto Eto Bebi Ola.

¹ Mɔ kosate nwɛ ni bafokanɔfɔ eto uninɛ lɛ mi ntii, nla miɛ maale bafokanɔfɔ eto beninɛ ba nkpe mi lenti kɔlɛ. Mɔ kosate ɛnyɛ kase Kristo dɪnyɛ kanyi, nya lɛ bɛlɛkɛ wɛ bateɛ, muunyɛ kediko lɛ wɛ diyɛnde nɛmɛ kɛmiɛ. Nla miɛ maateyi mi minke, ² bɛlɛ Onanto eto bafokanɔfɔ eto ditsyukpa nɛ bɛfi bɔkpe mi lɛ kɔni bɛ bebe ola ku kafɔ faa, fɛ kase Onanto letɔ utsyiko mi ɔfɔ. Bienyifo keyifo kamfɔ bɛ lɛ bifi bɛbɛbɛ kutɛkɛ kɔ dimɛnnɪyɛ itɛ, bomu biyifo ke ku kesumu seka. ³ Bienyifo ke bidi sɛkplɛ lɛ mba bɛfi bɔkpe mi kalɔ ɛsuɛ, bomu

bete ditsyæbi sæ itə basamu eto etsyukpa nnya nkpe mi kalɔ. ⁴ Nya lefe nə Kristo, Nwə Laayenko Basamu eto Uninə Kenke luubəə, lə uti mi lekankpakpa kosate nəmə, nə ni nə laambia kulefe.

⁵ Nko ke ini itə mi lekososa tsya nɛ, bə bebokosə əsuə kasɔ bitə bafokanɔfɔ ninə ba eto kalɔ benkpe. Mible kenke bebokosə əsuə kasɔ bitə bətsyuə lə mi eyifosa əsuə. Itsyise Awonisa Kenke eto Kukue lɛ bɔteyi nkə, “Onanto əənyə lə mba laabesə əsuə kato əsuə, fɛə woawunsəko mba laabokosə mə əsuə kasɔ.”

⁶ Nyaso beboksə mi əsuə kasɔ bɛkɛ lə Onanto eto kɔni keklege komə kalɔ, bə lə obesə mi kato lə wə lefe sæ əsuə. ⁷ Bifi mi asa nnya kenke laakpɛ mi bulə bekpe lə Onanto eto ani, itsyise wə laale mi ola.

⁸ Bitəkə ənə, bisjə bikabe kusu. Mi olo Obon-sam lɛ botsyilama kafa, kato ɔkɔɛ fe tsyata, nya ɔnlɛ utidi bɔbɛbɛ nkə lə usənsə ɔyimi. ⁹ Bifi bɔfokanɔ keklege biɲyə lə wə əsuə, se binyi biə mi bayimi bafokanɔfɔ lə kawunsjə kenke tsya kpɛ lə kanyinyənyə kamfo ke eto okle əsuə.

¹⁰ Fɛ lə binyə kanyi kamfo itə lefe kliminti kamaa, Onanto, nwə eto lefonə ləmbə kalokɔ, wəə lékpadi mi nkə bibə binyə kedikɔ lə wə diyənde manlo nə diyifo lɔni ku Kristoo, wə kosate əbɔflosə mi, okpe mi nkə ale lə binyə keklege. ¹¹ Wə ni əsuəale idu manlo isu manlo. Ibə itə.

Bokla Fɛfɛ

¹² Nlɛ kukue kliminti komfo bɔwɔni kətə mi ɛyɛ lə Silvano wə mimfi fe ɔyimi wə lefo ɔnɔ

əsuə. Nla miə maakpe mi nkɛale ku nnya mɔ kosate dínyə miə Onanto eto lefonə kosate nəmə ni nəmfo. Nyaso biínyə kekleke lə nnya əsuə.

¹³ Mi bafokanɔfɔ tsyuə ba tsya Onanto díləkə lə Babilonia eto kasɔ ku mɔ ubi Marko bə bəəsiəsə mi o-o. ¹⁴ Bebuta bətsyuə lə bisisə bətsyuə ku bafokanɔfɔ eto lelabi.

Diyuəsə lə disieko mible ba kenke diyifo bani ku Kristo.

**Onanto eto kakle fofɔ; Sɛkpɛle
Sekpele: Onanto eto kakle fofɔ; Sɛkpɛle New
Testament**

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Sep 2022 from source
files dated 13 Jul 2022

5fc03d2a-3cf8-5607-a6e0-9e1e197140bd